

# Macau Scam: Warga emas kerugian RM140,000 diperdaya 'Puan Rohani'

Aida Aziz

Januari 17, 2023 19:51 MYT



*Seorang wanita warga emas kerugian sebanyak RM140,000 akibat terpedaya dengan penjenayah Macau Scam yang menyamar sebagai pegawai polis. - Gambar hiasan*

**MANJUNG:** Seorang wanita warga emas kerugian sebanyak RM140,000 akibat terpedaya dengan penjenayah Macau Scam yang menyamar sebagai pegawai polis.

Menurut Ketua Polis Daerah Manjung, ACP Nor Omar Sappi, mangsa berusia 66 tahun dan tidak bekerja itu telah dihubungi oleh seorang individu yang memperkenalkan dirinya sebagai Puan Rohani sejak Oktober tahun lalu.

Katanya, mangsa dimaklumkan kononnya terbabit dalam kes pengubahan wang haram dan akan ditangkap susulan jenayah tersebut.

"Pihak polis dari Ibu Pejabat Polis Daerah (IPD) Manjung terima satu laporan polis berhubung penipuan Macau Scam semalam.

"Mangsa telah ditipu bermula Oktober 2022 sehingga penghujung Disember 2022. Pada 16 Januari mangsa buat semakan dalam akaun bank dan mendapati duit telah berkurang," katanya dalam kenyataan pada Selasa.

Dalam pada itu, beliau berkata mangsa telah diminta memindahkan wang dari Tabung Haji ke akaun bank mangsa.

"Mangsa diminta menyerahkan butiran bank kepada *scammer* dan *scammer* sendiri telah memindahkan wang mangsa ke akaun individu tidak dikenali.

"Mangsa hanya sedar dirinya ditipu setelah membuat pemeriksaan di dalam akaun bank miliknya dan mendapati wang di dalam akaun tersebut telah tiada," katanya lagi.

Nor Omar berkata sebanyak RM2.4 juta membabitkan 87 kes Macau Scam direkodkan di daerah Manjung sepanjang tahun lepas.

"Polis mendapati antara modus operandi penipuan Macau Scam adalah suspek menghubungi mangsa dengan menyamar sebagai penguat kuasa, polis, Lembaga Hasil Dalam Negeri (LHDN), Suruhanjaya Pencegahan Rasuah Malaysia (SPRM), mahkamah, institusi kewangan atau syarikat perkhidmatan.

"Orang ramai diingatkan supaya tidak melayan panggilan telefon oleh individu yang tidak dikenali selain tidak mendedahkan maklumat perbankan kepada mana-mana pihak," katanya lagi.